



# Tuhaqtauyukhaq

## Minista Shewchuk: Nunavunmi Nattiqhiuqtut Pittiaqhutik, Aularaanginnarianganilu

**OTTAWA, Ontario (Januali 28, 2010)** Nunavut Minista Avatiliqiyitkunni Daniel Shewchuk tuniyait havaktit ilihaqtullu uvani Nunavut Sivuniksavut (NS) Iiharvianut ilitaritjunmik katimaplutik Aatuvami uplumi, ilitariplugu ilihaqtut ikayuutanik Nunavunmi nattiqhiuqtinut aturyuummiriangani aularaanginnarianganani pitquhikkullu atuqpaagaat Inuit nattiqhiuraangamik.

“Piqaqtuq amigaittunik uqaumayautigiliqtauvaktunik ukpirinnaittuniklu mikhaagut nattiqhiurniup havaaqhaqariaqaqtugut tuhaqtittaangani nakuuyumik tuhaqtakhamik nattiqhiurnikkut Nunavunmi hilaryuamut,” uqaqtuq Minista Shewchuk. “quyagiumayatka nan’ngariumaplugillu ukua Nunavut Sivuniksavut ilihautigiyait ikayurmata uvuuna. NS-mi ilihautut Nunavunmik ikayuqhutik. Takupkaqtat Kanata hilaryuarlu ilautigiyait Inuit pitquhiit nuatqatigiittiarniillu aularaanginnarianganani pittiaranganilu pitjutigiyaanut pivalliatjutauyumik nunamit.”

Iitariyautjut tuniyauhimagayuk Ministamut piqaqtuq uuminnga Nunavut Natures Edge Naunaitkutaanik, nattiit aallallu amiit niuviqtauliqpaktut, nunaptingni hilaryuamilu, naunaiyautigiplugu tahapkuninnga aularaanginnaqtumik nakuuyumik Inuit angunahuarnianik.

Qangannuaq European Union-kut pilailaqinahuqtaat nattirnik niuvirianganani ihuitjutauyuq maniliurianganani Nunavut nattiinnit. Pilailaahuut piyauyuq akhuuqtauhimagamik EU Katimayiryuangit huraangit nagliguhukhulik taimailiuliqpaktunit. Nan’ngariniq NS-kunni ilihautunik akiraqturahuarmatigu Nunavunmi nattiqhiurniq ilauyuq hilutjutainni Kavamaata Nunavut kangiqhipkarahuahugit Kanatamiut hilaryuamiullu nattiqhiurnirmik Nunavunmi.

“Tunihiniq nattiqhiurnikkut pitquhinik atuqpaktaminiklu, kingunirminit hivunirminut nutaqqamingnut, taimaa nattiqhiurniq nakuuhimmaqtuq Nunavunmi ahinilu amigaittuni Ukiuqtaqtumi nunallaani uplumi.” Uqaqtuq Shewchuk. “Quyagiumayaffi tuhaqtakhakkut pigapta imaa Nunavunmi nattiliqiniq aularaanginnarniaqtuq, pittiaqtauyuq atuqtaunginnarniaqhunilu. Hamna uqautigiyauyuq unipkaariyakhaqqut.”

Ilagiplugu ilihautinut, ilihautut NS-mi ilihaqhimayut nattiqhiurnirmik pilailaqiyaunahuarnirmik amirniklu narruhuktunik pinahuaqtut pilutiklu ikayurahuarlugu nattiliqiniq katimalutik Parliament Hill-mi. Talvani katimalutik ilihautut aannuraaqarniaqtut nattirnik, ilangit tuniyauhimagayut Avatiliqiyinit.

###

### Tuhaqtakhaliqinikkut hivayaqtakhaq:

Sharina Dodsworth

Atan’nguyauullaktuq Tuhaqtakhaliyini

Kavamanga Nunavut, Avatiliqiyitkut

[sdodsworth@gov.nu.ca](mailto:sdodsworth@gov.nu.ca) | (867) 975-7749